

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Union Home Minister Pu Amit Shah-an AizawlaAssam Rifles ram chhuahsan tura building hlui man cheng nuai 520 vel peksak an inhuam thu Chief Minister Pu Lalduhoma a hrilh.
- 2. Union Minister of State, Minority Affairs and Fisheries leh Animal Husbandry & Dairying changtu Pu George Kurian-an Mizoram a rawn tlawh.
- 3. Prime Minister Narendra Modia kaihhruaiin vawiin khan Niti Ayog Governing Council Meeting New Delhi-ah an thukhawm.
- 4. Prime Minister Narendra Modi chuan naktuk Pathianni chawhma dar 11 hian 'Mann Ki Baat' programme a hmang leh dawn.



CM IN DELHI

Union Home Minister Pu Amit Shah-an AizawlaAssam Rifles ram chhuahsan tura building hlui man cheng nuai 520 vel peksak an inhuam thu Chief Minister Pu Lalduhoma a hrilh.

New Delhi khawpuia Rising Northeast: Investors Summit 2025-a a tel bakah Chief Minister hian nimin khan Union Home Minister Amit Shah hi hmu in thil pawimawh hrang hrang an sawi dun a, Mizoram Sawrkar Flagship Programme Bana Kaih (Handholding Scheme) atana Peace Dividend inpek theih a nih leh nih loh chungchang sawiin Amit Shah chuan Mizoram CM hnenah remna leh muanna a awm theih nana a tawrhna an hriatpui a ti a, Assam Rifles ram chhuahsan tura building hlui man peksak an inhuam thu sawiin, Airport Authority of India (AAI) kuta Lengpui Airport hlan chungchang pawh sawiin Home Minister chuan a rang thei ang bera chinfel a tum thu a lo hrilh a ni.

Pu Amit Shah hian Myanmar atanga raltlante chhinchhiahna tur portal Mizoram puala an siam chu peihfel a nih tawh thu a sawi a, Chief Minister chuan Mizo Territorial Army Battalion din a nih theihna tura a hmalakna avangin Home Minister hnenah lawmthu a hrilh a. Ram venhimna mai

piahlahmah Mizo thalaite tana hna siamtu pawimawh tak a ni tih sawiin a taka kalpui a nih thuai nana Director, Intelligence Bureau nena bawh zui ngai la awm te an sawidun bawk.

Pu Lalduhoma hian Union Finance Minister Pi Nirmala Sitharaman pawh hmu in Mizoram hmasawwna tur hrang hrang an sawi dun a, Chief Minister chuan Mizoram Rural Bank a Mizote a tam thei ber an luh theihna turin recruitment rules pawtfan turin Finance Minister hi a ngen a. Finance Minister chuan a ranglama lo ngaihtuah a intiam a. Mizoramin CSR Fund a tam thei ang ber a dawn theihna tura theihtawp a chhuahpui tur thu a lo hrilh a, inkawmnah ah hian Mizoram Sawrkar Flagship programme Bana KaihScheme atana sum mamawh dan te an sawidun bawk.

Pu Lalduhoma hian Union Minister for Jal Shakti, Pu C.R. Patil pawh hmuin Jal Shakti Ministry kaltlanga Mizoramah hmasawwna ruhrel din tûr chungchângte an sawidun a, Union Minister of State for Education and Development of the North Eastern Region Sukanta Majumdar pawh hmuin Mizoram hmasawwna tur hrang hrang a sawipui bawk.

<><><>

POWER MINISTER PRESS CONF

Power & Electricity Minister Pu F.Rodinglana'n Electric bill pek dan system thar- Pro rata basis hnuaiah fixed charge chu thla 1 anga kal lovin nitin a kal tawh dawn avangin mipuiten tunhmaa an chawi thlawn thin ang kha a awm tawh dawn lo tih a sawi.

P&E Minister Pu F.Rodinglana chuan vawiin khan a chenna inah thuthar thehdarhtute kawmin, tun thla atanga hman tan Electric Bill thar kalpui dan chungchang a sawifiah a, system thar- Pro rata basis an hmang tawh dawn tih sawiin, fixed charge thla 1 anga kal thin kha tunah chuan nitin a kal tawh dawn a, thla khata inkhawl khawm teuh a awm tawh dawn loh avangin a thenah chuan a tam angin a lang dawn a, hetihlai hian mipuite an hlawk tawh zawk dawn a ni a ti.

Power Minister chuan an system thar hman turah chuan Bill pe tha tan bill a tlem dawn a, bill pe tha lo, inhnawh khawl te tan a sang thung dawn tih a sawi a, Minister chuan Revamped Distribution Sector Scheme (RDSS) hnuaiah Electric sem darhna kawnga hmasawwna hna chi hrang hrang thawh mekin a ken tel, electric Bill siamna software thar chu Aizawl, Lunglei, Lawngtlai, Siaha, Serchhip, Champhai, Khawzawl, Saitual leh Kolasib-ah te tun thla atangin hman tan a ni a ti a, RDSS hnuaiah hian Smart Meter hman a nih tawh dawn avangin kum 2/1 hnuah chuan state dang angin electric bill chu pek lawkna, pre-paid a kalpui a nih tawh dawn a, mipuiten a ruala an tawrh vak loh nan tun atangin an inhmakhua a, hei vang hian Electric Bill thar hi an kalpui tih a sawi bawk a ni.

Byte: P&E Minister

Electric Department thuneitute chuan he software thar hman tan avang hian bill la hmulo awm theih a ni an ti a, Bill la hmu lo te tan pawh computer atangin Website: pedmconsumer.ugoerp.com-ah leh Mobile App: pedmconsumer application atang te in bill a pek nghal theih bakah bill

chipchiar zawka en theih turin, pdf format a download theih a, P&E Mobile App hi chhungkaw tin ten an download chuan Bill pek kawngah a awlsam phah hle dawn tih an sawi bawk a ni.

<><><>

UNION MINISTER

Union Minister of State, Minority Affairs and Fisheries leh Animal Husbandry & Dairying changtu Pu George Kurian-an Mizoram a rawn tlawh a,

Vawiina Lengpui Airport a rawn tum hnuah Union Minister of State hian Lengpui khaw chhunga mimal sangha dil siamte bakah North Eastern Council (NEC) hnuiaia Fish Farmers' Training Centre dinna tur hmun, Laldenga Fisheries Demonstration Farm-te tlawhin, hma lak tum dante a enpui a. He hunah hian Fisheries Minister leh Department hotute chuan Mizorama sangha khawitute harsatna hrang hrang Minister hnenah hian thlenin, sangha khawi hmasawnna tura Sawrkar Laipuia state sawrkarin project a thehluh tawhte, Zawlnuam-a Integrated Aqua Park tur telin, lo pawmsak thuai a nih theihnan Union Minister chu an ngen a.

Union Minister chuan sangha khawitute sum lama an harsatna sutkianna atan Fish Farmers Producer Organisation (FFPO) hnuiaia Equity Grant a kawhbmuh a. Sangha chaw lakna chungchanga an harsatna chu tualchhunga sangha chaw siamchhuah dan ngaihtuah tur leh startup ang zawng pawha an kalpui theih thu a hrilh a. Pu George Kurian-a hian sangha khawituten sawrkar hnuiaia anmahni tana hamthatna awmte an hriat a ngai pawimawh hle a, outreach programme neihpui turin officer a lo thawn tur thu a sawi.

Pu George Kurian-a hian Aizawl a lo thlen hnuin Khatla-ah Ornamental Fish Rearing Unit dinna tura Pradhan Mantri Matsya Samapada Yojana (PMMSY) scheme hnuiaia tanpuina dawng tura thlan Sales Outlet a tlawh a. PMMSY chu Sawrkar Laipui-a Department of Fisheries, Ministry of Fisheries, Animal Husbandry and Dairying hnuiaia hmalakna a ni a. A tum ber chu India ramah sangha khawi lama hmasawnna tluantling, khuarei daih neiha, Blue Revolution thlen a ni a. Sangha khawi, enkawl, zawrh leh a kaihhnawih thila hmalak ngaihnte kalpuia, sangha khawitute hamthatna ngaihtuahsaka, tunlai mila her danglam leh tihchangtlun a tum a ni.

Pu George Kurian-a hi Mizoram Volleyball Association-ten Airport-ah an lo hmuak bawk a; zanin hian LPS Arena, Falkland-ah Pro Volleyball League inkhel a en ang a, naktukah New Delhi panin a haw leh dawn a ni.

<><><>

HEALTH MINISTER

Health Minister Pi Lalrinpuui'n Sub centre zawng zawngah Mipui health care-a inziah luh theih a ni a ti a, June thla tawp thleng inziah luh hun hawn anih angin mipuite a tam thei ang ber inziak lut turin a sawm.

Vawiina Aizawl Ramhlun North Health Centre Building thar a hawwnaah he thu hi sawiin Health Minister chuan health clinic tha tak a awm thei chu lawmawm a tih thu leh thawktu tur pawh sawrkarin a ngaihtuah dawn

a, mipui tam zawk tana tangkai taka hman a nih a beisei thu a sawi a. Mipui Health care registration chu sub centre ah tih tur a nih avangin theihtawpa mipuiah hrilhhriat an ngai tih sawiin June thla thleng chauh registration hun hawn a nih dawn avangin theihtawp chhuahpui turin a sawm nghal bawk a ni.

Health Centre sak nan hian Sawrkar atanga hmuh cheng nuai 2, sing 9 bakah Ward Corporator Pi C. Lalchhandami chuan Property Tax Return atangin cheng nuai 4 thawh belhin sak a ni.

<><><>

HOME MINISTER

Home Minister, Pu K Sapdanga hovin Deputy Speaker Pu Lalfamkima leh Tuirial Bialtu MLA ,Pu K Laldawngliana ten Kawnpui leh Sairang inkar National Highway kawngpui dinhmun an en a; kawng chhe zual chak zawka siam dan tur leh lirthei kal dan turte ruahmanna an siam nghal a ni.

He hunah hian NHIDCL hotute leh Contractor te pawh tel ve in, Home Minister, Pu K Sapdanga chuan National Highway 6, Kawnpui leh Sairang inkar chu Mizoram chak lakna kawngpui pawimawh tak anih avangin an hna thawh mek chu chak lehzuala thawk turin NHIDCL leh PWD aiawh lokal te chu a hrilh a. Mizoram PWD enkawlna hnuaia la awm Kawnpui leh Khamrang inkar chu State sawrkar sum a awm ang ang pawt khawmin a chhe nasa zual lai thawm that hna thawh a nih tur thu a sawi. NHIDCL lam atang hian Kawnpui leh Khamrang inkar kawng chu siam tha turin Tender an chhuah tawh thu leh sum sanction an la dawn loh avanga hma an lak theih loh thu tarlan a ni a, hei vang hian PWD chuan a chhe nasa zual lai thawm that hna an thawk mek tih an sawi bawk.

Tun dinhmuna kawng chhe nasa zual lai bik, Sairang leh Buichali Lei inkar chu ruah sur loh hun nghak kher lova a rang lama siam nise tih a ni a, chak taka hnathawh anih theih nan kawng hi lane khat siam hna kal hmasak tir nise, hnathawh lohna lam zawkah chhun lamah Lirthei rit phur lo kal tir a, Zan lamah lirthei rit phur te kal tir nise tih a ni.

<><><>

R NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

MNF

Manipal Hospitals-in Civil Hospital nena thawk tlang tur leh Association of Physicians of India Mizoram nena CME hmanga inthlunzawmin, Mizoram mipuite tan specialty hrang hranga inenkawlna an chhawpchhuak dawn tih an sawi.

Vawiina Aizawl Press Club-a thuthar thehdarhtute an kawmnaah Kolkata-a hmunpui nei, Manipal Hospitals-a thawk doctor-te chuan hmarchhak bialah inenkawlina tha zawk a awm theihna turin hma an la mek an ti a, kum 15 chuang chu Mizoram atangin damlo sing 1, sang 5 chuang an enkawl tawh a, an zingah hian Manipal Hospitals Network unit pakhat, Medica Superspecialty Hospital-a kal thlak hlawhtling 70 chuang an awm a, hlawhtlinna rate chu zaa 95 a ni an ti a. Cardiology, Cardiac Surgery, Neurosurgery, Orthopaedics, Oncology, Nephrology ang chi specialty hrang hrangah Mizoram mipuite hlawkna tur atan Aizawl-ah Outpatient Department, OPD kalpui tum a nih thu an sawi bawk a ni.

<><><>

NITI AYO

Prime Minister Narendra Modia kaihhruaiin vawiin khan Niti Ayog Governing Council Meeting New Delhi-ah an thukhawm. Prime Minister Modia chuan khawvel huap pawha zahpuiawmlah khualzinte hip thei tur hmun pakhat tal siam turin state thuneitute a chah a. Pu Modia chuan hetiangah hmalak anih chuan a chhehvela khawpuite pawhin an lo chhawr ve dawn tih a sawi a. India chu hmalam hunah khawpui tha tak tak nei tura a inbuatsaih a tul thu sawiin tunhnaiah nasa takin khawpui a thang a ti a. Hmasawinna, ngaihtuahna thar hman leh hmasawinna tlo te chu heng khawpui than tirtu pawimawh an ni tur a ni a ti bawk.

He hunah hian State Chief Minister te leh Union Territory Lieutenant Governor te, Union Minister te leh NITI Ayog Vice Chairman, Member leh CEO te an tel a.

Mizoram Chief Minister Pu Lalduhoma pawh he hunah hian telin ani bakah hian Uttar Pradesh Chief Minister Yogi Adityanath, Andhra Pradesh Chief Minister Chandrababu Naidu, Himachal Pradesh Chief Minister Sukhwinder Singh Sukhu, Madhya Pradesh Chief Minister Mohan Yadav leh Chhattisgarh Chief Minister Vishnu Deo Sai te pawh an tel a ni.

<><><>

PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chung leh ram pawn mipuite hnenah thu a sawi leh dawn a, Tun tum ami hi a tum 122-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

<><><>